



PAHAYAGAN SANG PARTIDO KOMUNISTA SANG PILIPINAS ★ ISLA SANG NEGROS

# ANG Paghimakas

GINAUBAYAN SANG MARXISMO-LLENINISMO-MAOISMO AGOSTO 2023

EDITORIAL

## Palapdon ug konsolidahon ang nagkahiusang prente batok sa tiraniya sa estado ug pagpanglupig

ANG KATAWHANG PILIPINO NAG-ANTUS GUMIKAN sa dili na maagwanta nga mga porma sa pagpahimulos ug pagpanglupig nga gimugna sa paspas nga nagkagrabeng kalibutanong krisis ug sa nagkadunot nga kahimtang sa alang-alang kolonyal ug alang-alang pyudal nga sistema sa Pilipinas. Ang sosyo-ekonomiko nga kundisyon nagpadulong sa usa ka mas grabe nga sitwasyon dihang si Marcos Jr nahimo nang hingpit nga itoy-itoy sa imperyalismong US.

Si Marcos Jr mingpalig-on sa iyang pulitikal ug ekonomikanhong kutay sa iyang imperyalistang amo, samtang ang naglagot nga China padayong mipahait sa tensiyon pinaagi sa mga agresibong lakang sa West Philippine Sea. Ang ka-



"Palapdon..." *sundan sa pahina 2*

Editorial: Palapdon ug konsolidahon ang nagkahiusang prente batok sa tiraniya sa estado ug pagpanglupig, p1 • 14 ka armas, nasakmit sa aksyong militar sa NPA sa Negros, p3 • Sobra 200 ka mga paglapas sa tawhanong katungod sa 8 ka bulan, p5 • Desisyon sa Korte kay Ka Frank, gipanghimaraut, p6 • Autopsy report nagpamatuod sa brutal nga pagpatay nila Acosta ug Jimenez - NDF Negros, p7 • Ikaduhang Kongreso sa CNL-Negros, gilunsad, p7 • NDFP@50, gisaulog, p8 • Puasa isip porma sa protesta, p8 • Kadaugan sa Kampanya Pagpataas-Suhulan, p9 • Iwag sa Rebolusyon, p10 • KRP isip giya aron palig-unon ang rebolusyonaryong optimismo, p11 • Pagpalig-on sa ideolohiya taliwala sa FMO, p12 • Balita sa Isla, p13 • 4 ka armadong aksyon, gilunsad sa NPA sa Panay, p15 • Kadre sa Partido, aktibista gipatay sa Bohol, p16 • Ang masang pakigbisog sa Brgy. Tamaraw, p17 • Tamlang Valley: "Sona sa Neoliberal nga Adyenda", p19 • Rebolusyonaryong kaisog taliwala sa kabangis militar, p21 • Unsa ang heat stroke?, p23 • SONATA: Kamo ang hinungdan, p23

"Palapdon..." gikan sa pahina 1

samtangang rehimeng Marcos nagtugot sa US nga mogamit sa eksklusibong mga pasilidad sa sulod sa mga kampo militar sa Armed Forces of the Philippines (AFP) ug sa teritoryo sa nasud nga gabligar niini nga mosalmot inkaso mobuto ang inter-imperyalistang gubat.

Bisan pa sa iyang masilawong ilusyon nga nagalambo ang kahimtang sa mga Pilipino, ang pagantus sa mga masa nagpakita sa law-ay'ng kamatuoran nga misamot lamang kini. Minilyon ka mga Pilipino ang nanlimbasog batok sa taas ug padayong nagsaka nga mga presyo. Bisan pa sa panghambog nga nikunhod na ang implasyon sa Western Visayas niadtong Hulyo, ang Negros Occidental nagrehistro pa gihapon og pinakataas nga tantos sa implasyon sa rehiyon nga may 7.6 porsyento, gisundan sa Bacolod City nga may 6.6 porsyento. Ang Rehiyon 6 adunay mas taas nga tantos sa implasyon itandi sa nasudnong kantidad. Samtang, ang Negros Oriental nagtala sa kinatibuk-ang implasyon nga 5.9 porsyento.

Ang minimum nga suholan sa mga prubinsya sa Negros nagpabiling ubos sukwahi sa mahal nga presyo sa mga batakang panginahanglan. Ang kasamtangang dinagkuang pagsaka sa presyo sa lana siguradong maka-apekto sa bug-at na nga daan nga kahimtang sa katawhan sa isla. Samtang giduso sa mga dismayadong Negrosanon ang ilang mga katungod alang sa kagawasan ug katilingbanon ug ekonomikanhong hustiya, girakrakan sila og bala sa terorismo sa estado. Adunay seryosong krisis sa tawhanong katungod sa isla.

Sa pikas bahin sa maong mga kundisyon, ang Marcos Jr-Duterte nga panagkunsabohay mingbayaw sa burukrata kapita-

lismo ngadto sa pinakapungkay niini. Samtang nagpakaron-ingnon nga anaay panaghiusa, ang matag kampo sekretong nagplano sa pagpukan sa matag usa. Sa proseso niini, nangawkaw kutob sa ilang mahimo.

Sa yanong pagkaistorya, ang kasamtangang rehimen dili na magwanta ug dili madawat sa mga masang Negrosanon. Ang katawhan sa Negros nagmadasigon sa pagsubay sa dalan sa armadong pag-sukol aron panalipdan ang ilang sibil, pulitikal, ekonomikanhon ug kultural nga mga katungod. Samtang, ang mga inter-imperyalistang panagbingkil nagtimaan sa posibilidad sa usa ka walay pulos nga gubat taliwala sa nagkagrabeng sosyo-ekonomiko ug makitawhanong krisis, mahinungdanon gayud nga pukawon, organisahon ug palihukon ang labing lapad nga ihap sa katawhan aron mugnaon ang usa ka rebolusyonaryong bul-og.

Ang Communist Party of the Philippines (CPP) kanunay'ng determinado sa pagpangulo sa rebolusyon padulong sa kadaugan. Aron i-asdang ang nasudnon demokratikong rebolusyon, gigamit niini ang New People's Army (NPA) isip iyang espada ug ang National Democratic Front (NDF) isip iyang taming. Samtang ang NPA ang nangunang hinagiban sa Partido sa pagsakmit sa pulitikal nga gahum gikan sa nagharing hut-ong, ang armadong rebolusyon dili mahimong moabante nga walay usa ka nagkahiusang prente batok sa imperyalismo, pyudalismo ug burukrata kapitalismo.

Ang NDFP usa ka rebolusyonaryong organisasyon sa nagkahiusang prente sa katawhang Pilipino nga nakigbisog para sa nasudnong kagawasan ug demokrasya. Ang panawagan sa NDFP, sukad sa iyang pagkahimugso 50 ka tuig ang milabay niadtong Abril 24, 1973, nagpa-

biling batakan, tin-aw ug pundamental: Hiusahon ang katawhan para sa paglumpag sa alang-alang kolonyal ug alang-alang pyudal nga sistema pinaagi sa gubat sa katawhan ug para sa pagkumpleto sa nasudnon demokratikong rebolusyon. Ang NDF angayang anaa sa unahan sa mga kontra-imperyalista, kontra-pyudal ug kontra-pasistang pakigbisog sa katawhang Pilipino.

Ang "monocrop" nga ekonomiya sa kalamay sa Negros gipabilin sa imperyalismong US aron ikadena ang katawhan sa karaan na nga pyudal ug alang-alang pyudal nga relasyon sama ug mas grabe pa sa pagpangulipon, ug nagpugong sa reporma sa yuta ug nasudnong industriyalisasyon. Ang mga maguuma ug mamumuo sa uma nagpabilin nga atrasado ug makaluluoy. Busa, ang mga kontra-

"Palapdon..." sundan sa pahina 3

AGOSTO 2023



ANG **Paghimakas**

Nagapasalamat ang *Ang Paghimakas* sa mga kontribusyon nga naghimong madaugon niini nga isyu. Sa pagpalambo sa atong *Ang Paghimakas*, giawhag ang tanang tigbasa nga padayong mo-amot og mga balita, piktyur, istorya ug uban pang sinulat. Mangayo man kami sa inyong mga suhestyon ug komentaryo unsaon pa gyud palambuan ang atong bantalaan.



angpaghimakas@protonmail.com



negrosrevportal.wordpress.com



## #NPANegrosOffensives

# 14 ka armas, nakuha sa aksyon militar sa NPA sa Negros

NAKAPATIGAYON ANG MGA LARANGANG GERILYA ilawom sa Apolinario Gatmaitan Command-New People's Army (AGC-NPA) ug usa ka ambus, walo ka *harassment*, usa ka partisanong operasyon ug duha ka pagdis-arma diin dili moubos sa 15 ang patay ug 10 ang nasamdang mga tropa sa AFP ug Philippine National Police (PNP).

Nakakumpiska ang mga Pulang manggugubat og upat ka assault rifle, walo ka mubong armas, usa ka shotgun ug usa ka

.22 long barrel rifle, mga magasin ug bala ug uban pang mga kagamitang militar.

Gi-ambusan sa usa ka yunit sa Roselyn Jean Pelle Command (RJPC-NPA) ang *patrol car* sa PNP-Calatrava sa Sityo Calanugan, Brgy. Minapasuk, Calatrava, Negros Occidental niadtong Agosto 9, alas 9:40 sa buntag.

Nakakuha og upat ka *assault rifle*, mga bala ug usa ka .45 kalibre nga pistola ang mga Pulang manggugubat.

Patay ang usa ka pulis nga

si PCpl. Jaime Nuñez ug nasamdang ang tulo pa nga sila Calatrava Deputy Chief PCapt. Jesus Alba, PCpl. Dennis Nasis ug PStaff Sgt. Frank Caballero.

Minggamit ang mga Pulang manggugubat og mga riple nga *selective fire* ug usa ka *command-detonated* nga bomba para masiguro nga luwas ang mga sibilyan nga sakay sa kanter ug sakyanan sa *rescue* nga kuyog sa sakyanan sa kapulisan.

*"14 ka armas..." sundan sa pahina 4*

*"Palapdon..." gikan sa pahina 2*

pyudal nga pakigbisog, mga kontra-imperyalista nga pakigbisog usab.

Tahas sa nagkahiusang prente ang paglunsad og mga kontra-pyudal nga pakigbisog, nga gilakipan sa pakig-away batok sa *neoliberal* nga agresyon ug dinagkuang pagpangilog sa kayutaan aron itransporma ang mga tabunok nga agrikultural nga kayutaan ngadto sa mga komersyal nga plantasyon, engklabo ug pang-ekoturismo; pagpataas sa suholan ug mga benepisyos sa mamumuo sa uma ug mga presyo sa merkado sa mga produktong agrikultural; pagpakunhod, ug sa kadugayan, pagwagtang sa usura; ug pag-okupar sa mga bakanteng kayutaan aron mahimo kining produktibo, kuyog sa uban pa. Adunay daku nga away sab batok sa dinagkuang pagmina ug reklamasyon sa yuta.


Samtang nagdagan kining mga kampanya, ang mga reaksyonar-

yong armadong pwersa gipalihok sa estado aron pakgangon ang pakigbisog sa katawhan ug panalipdan ang interes sa mga dagkung komprador ug agalong yutaan. Ang National Task Force (NTF)-Elcac ug ang kontrol sa militar sa sibilyan nga gobyerno nagduso niining mga pasista sa pagkomiter sa nagkadaiyang mga pagpang-lapas sa tawhanong katungod, gikan sa *red-tagging* ngadto sa pagpatay ug pagmasaker sa mga sibilyan ug "*hors de combat*" ug mga grabeng kalapasan sa Comprehensive Agreement on Respect for Human Rights and International Humanitarian Law (CARHRIHL). Mapatigbabawan lamang kini pinaagi sa mga kontra-pasistang kampanya sa halapad nga mga masa.

Aron mapadayon ang kalihukan sa katawhan, ang mga rebolusyonaryong organisasyong masa ilawom sa NDFP gikinahanglan nga tukuron sa matag sityo, kabanikanhan, asyenda,

pabrikas, eskwelahan ug karsada. Angayan niining kab-uton ang labing lapad nga ihap sa gipahimuslan ug gilupigan aron tukuron ang mga pormasyon sa demokratikong gobyerno sa katawhan gikan sa komiteng pang-organisa ngadto sa barrio ug munisipal nga mga rebolusyonaryong komite.

Dinasig sa atong ulahing mga martir nga mga konsultant sa NDFP nga sila Rogelio Posadas ug Ericson Acosta, ang mga tahas ug hagit kinahanglang ipatuman nga walay kahadlok o pagpangduhaduha. Ang mga rebolusyonaryong pwersa kinahanglan mahimong maisogon apan disiplinado; hait apan daling mobati; ug mamugnaon apan tinago. Tataw ang mga makigbisogong tahas ug hinog ang mga kundisyon. Ang katawhan, ug ang katawhan lamang, ang motibong pwersa sa pagmugna sa kasaysayan sa kalibutan. Nagpadayon ang pakigbisog. **AP**



"14 ka armas..." gikan sa pahina 3

Sa wala pa ang ambus, nagpatuman og punitibong aksyon ang RJPC-NPA sa duha ka aktibong *intel asset* sa 79th IB nga silang Elisio Mahilum ug Felix Resotay Sr. sa Sityo Batyugon, sa mao gihapong baryo.

Matod ni Ka Cecil Estrella, tigpamaba sa RJPC-NPA, "ang pagkamakatarunganon sa gubat sa katawhan ang nagpakusog sa RJPC-NPA ug sa tibuok rebolusyonaryong masa sa norte nga bahin sa Negros para walay hunong nga magkonsolida ug magpalapad sa ilang han-ay."

Sa laing panghitabo, dili momenos sa tulo ang patay ug pipila ang nasamdan sa 79th IB sa kontra-opensiba sa usa ka yunit sa RJPC-NPA batok sa nahisgotan nga militar niadtong Abril 6, alas 3:47 sa hapon sa Sityo Seraje, Brgy. San Isidro, Toboso, Negros Occidental.

Dili moubos sa duha ang kaswalidad sa kumbinadong tropa sa 94th IB ug CAFGU dihang gipabuthan ug gilabaya'g granada sa mga Pulang manggugubat ilawom sa Mt. Cansermon Command

(MCC-NPA) ang CAFGU Detachment sa Brgy. Hilamonan, Kabankalan City, Negros Occidental niadtong Hunyo 13, alas 9:30 sa gabi-i.

Samtang, duha ka sundalo sa 94th IB ang namatay sa dihang gireyd sa masobra 30 ka tropa sa maong militar ang usa ka tim sa MCC-NPA sa Sityo Pangi, Brgy. Carabalan, Himamaylan City, Negros Occidental niadtong Hulyo 7, pasado alas 7:00 sa buntag. Namartir ang Pulang manggugubat nga si Ponciano Sevilla (Ka Bambang) sa maong insidente.

Upat ang patay ug 10 ang nasamdan sa 62nd IB ug sa Regional Mobile Force Battalion (RMFBn)-7 sa mga *harassment* nga gilunsad sa Leonardo Panaligan Command (LPC-NPA). Gihimo kini sa mga Pulang manggugubat niadtong Marso 6, 15, 20 ug 21, Hulyo 25 ug 30 ug niadtong Agosto 2 batok sa mga detachment ug sa mga nag-operasyong tropa sa 62nd IB ug RMFBn sa Central Negros.

Matod ni Ka JB Regalado, tigpamaba sa LPC-NPA, "kini ang kongkretong tubag sa NPA sa taas na nga listahan sa pagpanglapas

sa tawhanong katungod nga direktang gikomiter sa 62nd IB ug kapulisan sa mga inosenteng sibilyan sa Central Negros."

Sa usa ka partisanong operasyon sa LPC-NPA, patay ang usa ka lunod-patay nga *intel asset* sa 62nd IB ug sakop sa Barangay Intelligence Network (BIN) nga si Jorge Javier sa Sityo Guibawan, Brgy. Bucalan, Canlaon City niadtong Abril 16, alas 3:30 sa hapon.

Nasakmit gikan ni Javier ang usa ka *colt* .45 rebolber, usa ka .357 *magnum*, usa ka KG 9, duha ka magasin ug mga bala ug uban pang mga kagamitang militar. Nakumpiska usab ang iyang BIN *Identification Card* (ID).

Si Javier regular nga gataho sa Canlaon PNP ug sa detachment sa Brgy. Budlasan, Canlaon City. Lunod-patay usab kini nga gapangtukod og mga lokal nga aset sa pulis ug militar sa mga kasikbit nga baryo sa Brgy. Bucalan ug Budlasan.

Gidis-armahan sa LPC-NPA si Eddie Abarquez niadtong Marso 30 alas 3:00 sa hapon, sa Sityo Manlama, Brgy. Montilla, Moises Padilla, Negros Occidental.

Nakompiska gikan kang Abarquez ang usa ka *shotgun* ug usa ka .22 *long barrel rifle*, mga bala ug duha ka mga *cellphone*.

Nagkupot og iligal nga mga armas si Abarquez nga iyang gigamit sa pagpanghulga sa lumulupyong ug sa pagpangilog og yuta sa lugar.

Samtang, gidis-armahan ug gipahimangno-an si Penpen Fajardo sa Sityo Mora, Brgy. Pinukawan, Vallehermoso, Negros Oriental niadtong Agosto 13. Sakop siya sa Guardians nga adunay koneksyon sa militar.

Nakumpiska kang Fajardo ang upat ka pistola (usa ka .38 *caliber pistol*, usa ka .357 ug duha ka *frontier*) ug mga bala. **FP**

## Sobra 200 ka mga paglapas sa tawhanong katungod sa 8 ka bulan

GIKAN ENERO HANGTUD KARON, NAKATALA ang *Ang Paghimakas* og sobra sa 200 ka kasong paglapas sa tawhanong katungod sa isla sa Negros sa diin dili momubo sa 7,000 ang mga biktima.

Sa mga kabangis nga gihimo sa pasistang AFP/PNP/NTF-Elcac, pinakangil-ad ang 21 ka kaso sa ekstrahudisyal nga pagpamatay.

Nanguna ang pag-abdak ug brutal nga pagpatay kang NDFP *Consultant* Rogelio Posadas ug padayong pagkawala sa iyang kauban nga si Lyngrace Marturillas ug duha ka habal-habal drayber, pagmasaker sa pamilyang Fausto, pagpatay sa lima ka mag-uuma sulod sa usa ka adlaw sa Moises Padilla ug Guihulngan City, ug pagpatay sa tulo ka mag-uuma sulod sa usa ka semana sa sur sa Negros. (*Para sa dugang detalye, basahon ang mga ispesyal nga taho sa Ang Paghimakas nga gipagawas niadtong Abril ug Hulyo.*)

Walay hunong ang kabangis sa mga tropang militar bisan sa bulan sa Hulyo ug Agosto.

**62nd IB.** Gipatay sa tropa sa 62ndIB si Romy Catasio sa Sityo Balunggay, Brgy. Montilla, Moises Padilla, Negros Occidental niadtong Hulyo 20, pasado alas 11:00 sa gabii.

Nagbantay og masakyan nga motor si Catasio kuyog si Marvic Ebarle (Ka Bryan), usa ka Pulang manggugubat nga *on medical leave*, sa dihang kalit nga niabot ang usa ka *color gray* nga van ug walay kaluoy'ng gipamusil-patay ang duha.

Si Catasio, ang nag-atiman ni Ka Bryan dihang nasamdan sa tuhod sa kontra-opensiba sa LPC-NPA batok sa 62nd IB niadtong Mayo 20 sa Sityo Cupad, Brgy. Macagahay, Moises Padilla.

Girakrakan usab sa nahisgutang tropa ang balay sa gipasanginlang NPA supporter nga si Jonasio Blasco niadtong Agosto 5, alas 9:00 pasado, sa Sityo Cansimba, Quintin Remo, Moises Padilla.

Sa dihang nakita sa mga sundalo nga naningkamot makaikyas si Blasco bisa'g samaron na, subli kini nilang gipaulanan og bala hangtod namatay.

Sa susamang adlaw, nagpabuto og mortar ang 62nd IB gikan sa Brgy. Villegas Detachment, alas 5:00 hangtod alas 6:30 sa buntag, ug ilang gipagawas nga na-engkwentro nila ang mga Pulang manggugubat sa LPC-NPA sa Sityo Li-ong, Brgy. Imelda, Guihulngan City, Negros Oriental.

Paturagas usab nga nagpabuto og *grenade launcher* ang mga sakop sa 7th RMFBn niadtong Agosto 3, alas 8:00 pasado sa buntag, sa Sityo Amaga, Brgy. Balugo ug Sityo Mandi-e Dako, Brgy. Magsaysay, sa Guihulngan City.

Samtang, nakaagum og pagpangastigo sa 62nd IB ang lima ka mga mag-uuma nga gipasanginlang *supporter* sa NPA sa mga sityo sa Uyangan, Katuguisan ug Hinumayan, sakop sa Brgy. Budlasan, Canlaon City, Negros Oriental niadtong Hulyo 6.

Ingon man, padayong gihimo nga kampo militar sa 62nd IB ang mga tulunghaan sa Agulang Elementary School sa Brgy. Villegas ug Kambairan Elementary School sa Brgy. Trinidad, sa Guihulngan City gikan Agosto 3.

**94th IB.** Duha ka mag-uuma ang ilegal nga gi-aresto sa kumbinadong tropa sa 94th IB ug RMFBn-6 sa Sityo Cunalom, Brgy. Carabalan, Himamaylan City, Negros Occidental sa managlahing petsa.

Gidakop si Lodorico But-ay niadtong Hulyo 28 sa akusasyong *commanding officer* (CO) siya sa yunit milisya ug gikasohan og *rape*.

Samtang, gi-aresto si Romeo Balsemo niadtong Agosto 7 sa hinimu-himong kasong pagpatay.

Gikastigo sab ang iyang anak nga si Nono niadtong katapusang semana sa Hulyo.

Gipasanginlan ang magamahan nga sakop sa yunit milisya ug imbolbado sa engkwentro tali sa MCC-NPA ug 94th IB niadtong Abril 19, 2020.

Si But-ay ug ang mga Balsemo mga sakop sa Farmers Association of Brgy. Carabalan (FABCA) ug sa Indigenous Peoples (IP).

Sa katapusang inadlaw sa Hulyo, lima pa ka mag-uuma ang gi-imbestigat ug gikastigo sa mga sundalo sa 94th IB samtang usa ka mag-uuma ug duha ka menor de edad ang biktima sa pagpanghulga sa mao gihapong lugar.

Nanuhotsuhot naman ang mga sundalo sa 94th IB sa mga kakahoyan sa Sityo Cunalom ug sa kanait niining mga sityo samtang nagdala og trumpa ug nisinggit, "surrender na mo, mga NPA, ug gawas na mo diha sa inyong gitagoan!" Wala na miadto sa uma ang mga residente sa kahadlok nga masaypan'g mga sakop sa NPA.

Niadtong Hulyo 25, gipagawas sa 94th IB ug PNP nga nagsurender si Ariel Jay Latoza isip sakop sa Buhi nga Aksyon kag Pag-amlig sang Seguridad sang Mangunguma kag Mamumugon (BAKAS) nga gipasanginlan nga usa ka "*communist front organization*."

## Desisyon sa Korte kang Ka Frank, gipanghimaraut

GIPAHAMTANGAN SA TAGUIG CITY REGIONAL Trial Court (RTC) si National Democratic Front of the Philippines (NDFP) *peace consultant* ug kanhing NDF-Negros spokesperson Ka Frank Fernandez, 75 anyos, ug iyang asawa nga si Ka Cleofe Lagtapon, 70 anyos, og unom ka tuig nga pagkabilanggo subay sa hinimu-himong kasong *illegal possession of firearms* niadtong Hunyo 29.

Nagpatambal ang nasakit nga sila Ka Frank ug Ka Cleofe sa dihang giaresto sila kuyog ang ilang kauban nga si Ge-ann Perez sa mga pwersa sa estado niadtong Marso 24, 2019 sa Brgy. Calumpang, Liliw, Laguna.

Gitamnan sila og ebidensyang tulo ka kalib-reng .45 nga pistola, tulo ka magasin ug mga bala, ug tulo ka granada sa dihang gi-aresto.

Gipanghimaraut sa NDF-Negros ang maong desisyon sa Taguig City RTC.

Matud ni Ka Bayani Obrero, tigpamaba sa

NDF-Negros, ang desisyon sa maong korte nagpakita lang sa padayong malupigong plano sa rehimeng US-Marcos II batok sa mga rebolusyonaryong pwersa “aron pugngan ang nagkakusog nga pakigbisog para sa mga patriyotiko ug demokratikong pangandoy sa katawhan.”

“Nanawagan usab ang NDF-Negros og hustisya ug nagdemanda sa diha-diha nga pagpagawas nila Ka Frank Fernandez ug Ka Cleofe Lagtapon lakip na ang dul-an sa 800 ka mga bilanggong pulitikal sa Pilipinas,” dugang pa ni Obrero. **AP**



.....  
 "Sobra..." gikan sa pahina 5

Matud ni Latoza, usa ka *tricycle driver*, nga ikaduhang higayon na kini nga gipatawag siya sa usa ka gihinganla'g Tupan nga sakop sa Kabankalan City Police Station ug wala siya kahibalo nga himuon siya nga *surrenderee*.

**15th IB.** Nagpabuto og 14 ka bala sa kanyon ang 15th IB ug 3rd Artillery Division sa Philippine Army sa Sityo Don Jose, Brgy. Manlucahoc, Sibalay City, Negros Occidental niadtong Agosto 16.

Ang kanyon nahimutang sa Barasbarasan detachment sa Brgy. Camindangan sa mao gihapong syudad.

Matud sa AFP, may pagtugot ni Brgy. Captain Sergio Libre sa Brgy. Manlucahoc ug Sibalay Mayor Gina Montilla Lizarres ang maong pagpamomba.

Gihatagan og usa ka adlaw ang mga residente aron mahipos ang ilang mga kahayupan ug mobakwit.

Samtang, walo ka mag-uuma,

lima niini ang *senior citizen*, ang iligal nga gidakop sa 15th IB niadtong Hulyo 29 sa Sityo Tugas, Brgy. Pinggot, Ilog, Negros Occidental.

Gipasanginlan sila nga nipatay ni Nacar Granada nga gisilotan sa ASJC-NPA niadtong Enero 28 tungod sa pagka-*land grabber* ug regular nga ahente sa 15th IB.

Ang mga gidakop mga benepisyaryo sa yuta sa mga Granada.

**79th IB.** Duha ka mamumugon sa kampo ang giharas sa 79th IB sa Escalante City niadtong Hulyo 18, mga alas 6:00 sa buntag.

Giransak ang balay ni Rosalie Magbanua sa Sityo Alangahag, Brgy. Tamlang sa 12 ka mga wala naka-unipormeng sundalo sa 79th IB nga nagpaila'ng mga sakop sa NPA. Gipangitaan si Magbanua sa gibilin kuno sa NPA nga *high powered rifle* sa ilang balay.

Sa samang higayon, giadtoan si Edward Gimang sa ilang balay sa Sityo Buenavista, Brgy. Mala-

sibog sa gibana-bana 30 ka armado nga nangukay sa iyang kabtangan.

Pila ka adlaw sa wala pa ang pagpangransak, giadto si Gimang og armadong mga lalaki sa iyang gitrabahoang kampo aron dis-armahan apan sundang ug uban pang kagamitang panguma ang nakuha kaniya. Nasakit sa pila ka adlaw iyang asawa resulta sa sunod-sunod nga mga panghitabo.

**11th IB.** Pugos nga gipasur-render silang Tonying Sulano ug Rene Janayan sa 11th IB ug RMFBn7 sa separadong insidente niadtong bulan sa Hulyo.

Dugay na'ng giinitan sa mga pwersa sa estado ang pamilya Sulano nga taga-Brgy. Nagbalaye, Sta. Catalina, Negros Oriental, sa diin gipatay sa 11th IB ang igsuon ni Sulano niadtong 2021 ug pugos nga gipasur-render sa RMFB7 ang iyang tiyo niadtong 2022.

Samtang si Janayan, usa ka yanong mag-uuma sa Zamboanguita, Negros Oriental. **AP**

## Autopsy report nagpamatuod sa brutal nga pagpatay nila Acosta ug Jimenez - NDF Negros

GIPAGAWAS NA ANG AUTOPSY REPORT sa patay'ng lawas ni NDFP consultant Ericson Acosta niadtong Hulyo 29 sa University of the Philippines-Diliman sa Quezon City.

Sumala sa taho ni Dr. Raquel Fortun, *homicide* o gituyong patyon si Acosta ug adunay ebidensya nga gipusil pa gihapon bisan patay na.

Sila Acosta ug Joseph Jimenez, usa ka organisador sa mag-uuma, ang gipatay sa mga elemento sa

94th IB ug 47th IB niadtong Nobyembre 30 sa milabay'ng tuig sa Sityo Makilo, Brgy. Camansi, Kabankalan City.

Kini nga taho, matod ni Ka Bayani Obrero, tigpamaba sa NDF-Negros, nagpamatuod nga brutal nga gipatay silang Acosta ug Jimenez, sukwahi sa gisaysay sa mga militar nga kaswalidad sa engkwentro ang duha.

Nanawagan si Obrero sa mga sakop sa media ug mga tigpanalipod sa tawhanong katungod nga

moadto sa mga militarisadong komunidad ug kuhaon ang kama-tuoran gikan mismo sa mga lumulupyo.

Iya usab nga gipanawagan sa mga patriyotikong mga tropa sa AFP ug PNP ug mga biktima sa mga anomalosong programa sa NTF-Elcac nga ibutyag ang matuod nga mga panghitabo sa luyo sa daghang mga kasong pagpamatay ug uban pang krimen niining mga reaksyonaryong institusyon. **AP**

## Ikaduha nga Kongreso sa CNL-Negros, gilunsad

SA USA KA TINAGO NGA pagtigom niini lang, ang Christians for National Liberation (CNL)-Negros naglunsad sa ilang ikaduhang kongreso nga gitambongan sa mga rebolusyonaryong Kristiyano gikan sa nagkadaiyang mga simbahan, mga denominasyon, mga kongregasyon, ug mga institusyon sa isla sa Negros.

Gipalig-on sa Kongreso ang panaghiusa sa mga delegado para tun-an ang nasudnon ug rehiyunal nga sitwasyon sa katiling-

ban. Gihan-ay nila ang taktikal nga plano sa CNL-Negros ug giaprubahan kini.

Mingpili og mga opisyal ang maong organisasyon ug napili nga pangulo si Ericson Buglas.

Lakip sa plano sa CNL-Negros ang pagpadasig ug pagpalapad sa CNL ug paglambigit sa mga tumutuo sa pakigbisog sa mga bata kang masa, pagsalmot ug pagsuporta sa rebolusyonaryong armadong pakigbisog, paglunsad og mga kontra-imperyalistang kali-

hukan, pagwagtang sa NTF-Elcac ug pagsuporta sa subling pag-abli sa istoryahanay pangkalinaw sa tunga sa Gobyerno sa Republika sa Pilipinas (GRP) ug sa NDFP.

Matod pa ni Ericson Buglas, "himuon sa tibuok CNL-Negros ang iyang katungdanan sa pag-abante sa rebolusyon kuyog sa masa, ang tinuod nga tigmugna sa kasaysayan, ug sa umaabot nga sosyalistang katilingban diin tinuod nga mohari ang hustisya, kalinaw ug demokrasya. **AP**



## NDFP@50, gisaulog

MAHIMAYAONG GILUNSAD SA MGA REBOLUSYONARYONG pwera ang kasumaran sa ika-50 nga anibersaryo sa National Democratic Front of the Philippines (NDFP) niadtong Abril 24 pinaagi sa usa ka programa.

Nihatag usab og pamahayag ang mga organisasyong sakop sa alyansa sa NDFP sa isla sa Negros.

Sa wala pa ang anibersaryo, nakahimo og operasyong pinta ug operasyong dikit (OP-OD) ang mga sakop sa Kabataang Makabayan (KM) sa Central Negros.

Samtang, gisaulog ang ika-54 nga anibersaryo sa New People's Army (NPA) niadtong Marso 29 sa mga larangang gerilya ilawom sa AGC-NPA, Rehiyunal nga Kumand sa NPA sa isla sa Negros.

Gipasidunggan silang Benito Tiamzon (Ka Laan) ug Wilma Austria (Ka Bagong-tao) lakip na ang mga martir sa Negros sama nila Florida Ceballos, Romeo Nanta, Marilyn Badayos, Kerima Tariman, Ericson Acosta ug Rogelio Posadas pinaagi sa *silent 21-gun salute* isip simbolo sa paghatag og pinakataas nga pagsaludo kanila. **AP\***



**MABUHAY ANG IKA 50  
NGA ANIB SG NDFP!**



## Puasa isip porma sa protesta

NAGPUASA SULOD SA USA KA adlaw ang kapin 100 ka binilanggong pulitikal sa tibuok Negros sugod ala 1:00 sa kaadlawon niadtong Hulyo 24 aron ipanawagan sa rehimeng Marcos Jr nga hunongon na ang gihimo sa militar ug sa ubang mga pwera sa estado nga pagsalbeyds sa mga dili armadong sibilyan sa pagpatuman sa ilang kampanyang kontra-insurhensya sa isla.

Nakighiusa sa ilang puasa-protesta ang mga binilanggong pulitikal sa Cebu City ug Taguig City, diin nabilanggo hangtod karon ang kanhing tigpamaba sa NDF-Negros nga si Ka Frank Fernandez ug iyang asawa nga si Ka Cleofe Lagtapon.

Sumala sa Negros Island

Political Prisoners, nagpadayon ang ekstrahudisyal nga pagpamatay sa mga aktibista hilabi na sa bukirong bahin sa Negros sulod sa unang tuig sa administrasyon ni Marcos Jr.

Subay sa datus sa Karapatan, organisasyon sa mga tigpanalipod sa tawhanong katungod, 30 porsyento sa ilang natala nga 60 ka biktima sa mga pagpagsalbeyds ug pagmasaker ang mga Negrosanon nga mag-uuma ug mamumuo sa umahan.

Matud pa sa grupo, kaylap ang dinaghang ebakwasyon nga nagdislokar sa kinabuhi ug panginabuhi sa liboan ka mag-uuma sa Himamaylan City sugod Oktubre sa nilabay'ng tuig, mao usab nagpabiling "missing" ang

bata sa binilanggong pulitikal nga si Rossine Enyong kuyog ang duha ka drayber sa habal-habal nga gi-abdak sa mga ahente sa militar sa dalan sa Hinigaran, kuyog si NDFP *consultant* Rogelio Posadas, niadtong Abril 19.

Gipanawagan usab nila ang pagpagawas sa mga binilanggong pulitikal nga mga masakiton o may edad na matud sa *writ of Kalayaan* sa Korte Suprema.

Ikaupat na kining puasa-protesta nga gilunsad sa mga binilanggong pulitikal sa Negros.

Sa 778 ka binilanggong pulitikal sa kasamtangan, 139 o 20 porsyento niini ang naa dinhi sa isla sa Negros. **AP**



# Kadaugan sa Kampanya Pagpataas-Suhulan

PUNO SA PAGLAUM SI ROGER, 53 anyos, adunay asawa ug lima ka anak, dihang nagmadinaugon ang ilang kampanya para sa pagpataas-sweldo sa mga mamumuo sa katubhan sa usa ka asyenda sa Negros niadtong sayong bahin sa tuig.

Sakop si Roger sa batakang organisasyon sa Partido o mas naandan sa tawag nga BOP sa Brgy. Katmon. Gipatawag sila sa Seksyon Komite nga naglangkob sa upat ka barangay aron maghimo og plano sa paglunsad og kontra-pyudal nga pakigbisog. Gihi-moan nila og pila ka bulan nga *phasing* ang ilang kampanya ug pana-panahong gitasa ang plano aron makita ang kulang ug mga palambuonon.

Una nilang gihimo ang pagtigom og datus. Sayon lang kini para kanila ni Roger ug kaubanan tungod sila ug ang ilang mga pamilya direkta usab nga nagtrabaho sa mga asyenda sa ilang lugar ug mga kasikbit nga barangay.

Sa dihang nakumpleto na ang datos, nagmiting sila ug diha naghiusa sa ilang demanda nga pagpataas sa sweldo sa nagkadaiyang porma sa trabaho sa asyenda. Gipunting usab nila ang target nga mga agalong yutaan.

Gihimo ang unipikasyon sa plano kutob sa mga nagtrabaho ug mga organisasyong masa. Gipatabang usab ang mga sakop sa organisasyong masa sa pagkuha og dugang datos. Isip pagpangandam, naglunsad og mga pagtuong masa ug gipokusang ang Rebolusyonaryong Giya sa Reporma sa Yuta.

Isip bag-ong rekrut sa han-ay sa rebolusyonaryong kabatan-onan sa edad nga 19 anyos, si Kiko nibati og kalipay sa dihang nakakuyog sa plano sa pagpatigayon

sa kampanya sa pagpataas-suhulan. Makita sab niya ang taas nga kumpyansa sa katawhan sa Brgy. Katmon para sa kampanya tungod dihay mingtabang nga mga kadre sa Partido ug mga Pulang manggugubat.

Uban si Kiko sa dihang ilang gipili si Roger isip representante sa mga mamumuo sa asyenda para sa dayalogo nga maoy unang sultada sa kampanya. Nakab-ot nila ang engkargado sa asyenda ug nisugot usab kini nga motabang sa pagduso sa ilang mga demanda ngadto sa agalong yutaan. Kung magmagahi ang agalong yutaan, ang tanang nagtrabaho kuyogay nga moreklamo.

Apan tungod sa kahadlok sa agalong yutaan sa nagkahiusang katawhan nga may suporta sa rebolusyonaryong kalihukan, paspas ang pagtubag sa mga reklamo sa mga mamumuo sa katubhan. Ilang naangkon ang Php50 nga pagtaas sa nagkadaiyang porma sa trabaho. (Tan-awon ang Talaan 1)

Unom ka sityo ang nakabeneepisyo sa gilunsad nga kontra-pyudal nga pakigbisog. Adunay mga nagtrabaho sab nga gikan sa kasikbit nga tulo pa ka baryo.

Samtang, sa usa ka asyenda nga may kapin 100 ka ektarya



sa kasikbit nga Brgy. Ilang-ilang, nahimong madinaugon usab ang gilunsad nga kontra-pyudal nga kampanya sa katawhan. Nakapataas sa suhol sa pagdaro, pagguna, inadlaw nga pag-abono, tanum, pamatdan, karga/tapas ug may pagpataas usab sa pakyaw. Nakapataas usab og sweldo ang mga drayber sa traktora ug traking.


Nakabeneepisyo ang lima ka sityo nga adunay sobra 20 ka regular nga obrero ug may pana-panahon usab nga nagtrabaho gikan sa mga kasikbit nga sityo ug baryo.

Usa na niini si Lando, 47

*"Kadaugan..." sundan sa pahina 10*

Talaan 1

## Kadaugan sa kampanya pagpataas suhulan sa Brgy. Katmon Php50 nga saka sa suhulan



# Iwag sa Rebolusyon

ISKULHAWIS



MAHULAGWAY BA NIMO ANG PAGLIHOK sa usa ka ngitngit nga lugar nga walay iwag? Sigurado nga mapandol ka sa mga dagkung bato o mahulog sa lawom nga pangpang kung walay lamdag ang imong agianan.

Niadtong 1927, dihang ang Partido Komunista sa Tsina (PKT) nakaagum sa dakung problema nga gimugna ni Chiang Kai-shek, nahimong iwag kang Kaubang Mao Zedong ang kongkretong pagtuki sa

kongkretong kahimtang sa nasud ug katawhang Tsino subay sa gitudlo ni Kaubang Lenin, usa ka bantugang lider komunista sa Unyong Sobyet. Sayo pa, niadtong 1923, gisulat na ni Kaubang Mao ang “Pagtuki sa mga Hut-ong sa Katilingbang Tsino” nga nagpamatuod nga usa ka alang-alang kolonyal ug alang-alang pyudal ang nasud Tsina ug busa mag-uuma ang kinabag-ang

*"Iwag..." sundan sa pahina 11*

*"Kadaugan..." gikan sa pahina 9*

anyos, adunay asawa ug siyam ka anak. Dili komedya ang adlaw-adlaw nga pakigbisog ni Lando aron makapangita og pagkaon ug uban pang gastuhanan sa balay ilabina nga usa ka tuig pa ang iyang kinamanghurang anak. Maong lipay kaayo si Lando dihang naangkon nila ang kadaugan sa ilang kampanya.

Samatang, lain pang 114 ka ektarya nga asyenda sa Brgy. Ilang-ilang ang gitarget para sa kampanya sa pagpataas-suhulan. Dugay na ang reklamo sa mga mamumuo sa katubhan diri tungod tuig 2012 pa ang katapusang pagpataas sa suhulan sa agalong yutaan ug mumho lang ang gihatag nga pagtaas sa kantidad nga Php10.

Sa dihang nahibaw-an sa agalong yutaan nga nagmadinaugon ang kampanya sa pagpataas-suhulan sa kasikbit nga asyenda, hinanali kining nagpataas og suhulan sa nagkadaiyang porma sa trabaho. (Tanawon ang Talaan 2)

Ang kasinatian nila Roger, Kiko ug Lando nihatag kanila'g paglaum nga dili imposible ang pagpalambo sa kahimtang sa ilang panginabuhi diha sa panaghiusa sa katawhan ug sa ilang pagsalmot sa rebolusyonaryong kalihukan. Naamgo sila sa kamatuoran nga dekorasyon lang ang mga balaud ug *wage order* sa nagpuli-puling mga rehimen nga mao mismo ang makinaryas sa dagkung komprador burgesya ug agalong yutaan aron gapuson ang mamumuo sa uma sa grabe

ka baratong suhol ug murag ulipong kahimtang sa pamuo.

Niadtong Hunyo 2021, Php410 ang gitakdang suhulan sa Regional Tripartite Wage and Productivity Board (RTWPB)-6 para sa mga mamumuo sa agrikultura sa Negros Occidental, apan nalansang gihapon sa Php250 ang abereyds nga suhol nga gihatag sa mga agalong yutaan sa mga mamumuo sa tubo.

Diha sa nakab-ot nga kadaugan, mas nitaas ang kagustuhan sa mga susama nilang Roger, Kiko ug Lando nga mga masang linupigan ug gihimuslan nga mahimong madinaugon ang demokratikong rebolusyon sa katawhan. Tubagon man og mga dagkung operasyong kumbat sa Philippine Army ug mas mograbe ang pagpanglapas sa mga sundalo ug pulis sa tawhanong katungod, nagpabiling maisogon ang mga katawhan sa Brgy. Katmon ug Brgy. Ilang-ilang.

Sa giya sa mga kadre sa Partido ug uban sa ilang Pulang manggugubat, magpadayon ang katawhan sa paglunsad og armadong pakigbisog, pagpatuman sa rebolusyong agraryo ug pagtukod og baseng masa ug mga organo sa gahum pangpulitika hangtod nga makab-ot ang kinatibuk-ang kadaugan sa gubat sa katawhan. **AP**



Talaan 2

**Gipataas sa AY ang suhulan dihang nabalitaan nga nagmadinaugon ang kampanya pagpataas sa suhulan sa Brgy. Ilang-Ilang**

**Inadlaw Php115**

**Pamatdan Php850**

**Suma Php1,000**

**Daro Php800**

**Php200**  
(Php85 ang gisaka)

**Php1,050**  
(Php250 ang gisaka)

**Php1,500**  
(Php500 ang gisaka per laksa)


**Php1,000**  
(Php200 ang gisaka per ektarya)

## KRP isip giya aron palig-unon ang rebolusyonaryong optimismo

ANG KATILINGBAN UG REBOLUSYONG PILIPINO (KRP) ni Amado Guererro usa ka pundamental nga dokumento para sa mga rebolusyonaryo sa Pilipinas. Nagsilbi kining giya para sa mga sakop sa Partido, Pulang manggugubat ug mga rebolusyonaryong masa ilabina sa Hagonoy, usa ka bukirong barangay sa Negros Occidental. Ang pagtuki sa hut-ong sa katilingbang Pilipino, ilabina ang kontra-pyudal nga hut-onganong linya, minggiya kanila sa pagpukaw, pag-organisa ug pagpalihok sa masang mag-uuma ug mamumuo sa katubhan ug sa pagtino sa mga target para sa paglunsad og agraryong rebolusyon. Pinaagi sa KRP, nasabtan nila ang panginahanglan sa nasudnong demokratikong rebolusyon aron sulbaron ang alang-alang kolonyal ug alang-alang pyudal nga sistema.

Pila ka tuig ang milabay, ang mga Pulang manggugubat nga gi-asayn niini nga erya naka-sakmit sa usa ka bulawanong kahigayonan bunga sa ilang katilingbanong pagtuki. Nahibaw-an

"KRP..." sundan sa pahina 12



"Iwag..." gikan sa pahina 10

lumulupyo.

Ang paglunsad ni Kaubang Mao og SICA (*social investigation and class analysis* ukon katilingbanong pagtuki ug pagtuki sa hut-ong) sa katilingbang Tsino susama sa usa ka tawo nga hugot nga nagkupot sa iwag sa iyang pagbaktas sa usa ka lugar nga ngitngit. Sa dihang nakuptan sa PKT ang tukmang pagtuki sa katilingbang Tsino isip alang-alang kolonyal ug alang-alang pyudal sa iwag sa Marxismo-Leninismo ug sa SICA nga gi-himo ni Kaubang Mao, nahan-ay ang teorya ug praktika sa demokratikong rebolusyon sa katawhan pinaagi sa malanatong gubat sa katawhan nga minghatud sa Rebolusyong Tsino sa kadaugan niadtong 1949 ug minglingkawas sa ikaupat nga bahin sa kalibutan.

Ang SICA nga gimbuhaton dili lamang iwag sa Rebolusyong Tsino kung dili mao sab sa

ubang rebolusyon nga gilunsad sa mga proletaryong rebolusyonaryo sa tibuok kalibutan, ingon man sa Rebolusyong Pilipino. Busa, mahinungdanon kini nga bahin sa gimbuhatong pang-ideolohiya sa atong Partido isip pagsapraktika sa Marxismo-Leninismo-Maoismo. Ang Katilingban ug Rebolusyong Pilipino o *Philippine Society and Revolution* (PSR) nga gisulat ni Kaubang Jose Maria Sison gamit ang *nom de guerre* nga Amado Guererro, nagsilbi isip nangunang tamdanan ug giya sa paghikyad sa batakang prinsipyo sa duha ka yugtong rebolusyon sa Pilipinas nga nagbase sa pagtuki sa kongkretong kahimtang sa alang-alang kolonyal ug alang-alang pyudal nga sistema.

Gipasiguro sa tanang mga organo sa atong Partido, yunit sa mga Pulang manggugubat, organo sa gahum pangpulitika ug rebolusyonaryong organisasyong masa nga mohimo og SICA sa dili pa o dungan sa pag-

patuman sa mga gimbuhaton aron tin-aw nga masabtan ang mga tahas, klaro ang mga pamaagi sa pagpatuman ug pag-sulbar sa mga problema nga motumaw ug maseguro ang kapadulngan. Susama sa mga taktikal nga opensiba ug kontra-pyudal nga pakigbisog nga atong gilunsad, maalamon nga minghimo ug minggamit og SICA, busa madinaugon kining nahimo ug nakaani og signipikanteng benepisyong para sa Partido, Pulang hukbo ug ilabina gyud sa halapad nga katawhan.

Susama kini sa usa ka tawo'ng hugot nga minggamit og iwag sa iyang agianan, siguradong dili mapandol sa mga dagkung bato o ba kaha, mahulog sa mga lawom nga pangpang. Sa "kongkretong pagtuki sa kongkretong kahimtang" ug sa "pagpangita sa kamatuoran gikan sa mga hitabo" diha sa atong mga rebolusyonaryong paningkamot, sigurado ang atong kadaugan. **AP**

## Pagpalig-on sa ideolohiya taliwala sa FMO

NAGKAHIUSA ANG KAPANGULOHAN SA PARTIDO sa usa ka yunit sa NPA sa Northern Negros nga mopursige sa pagpalig-on sa ideolohiya taliwala sa sustenido ug dinagku'ng operasyong kumbat sa AFP. Sulod sa pila ka bulan, nagmugna ang mga *focused military operation* (FMO) og kadaut sa erya ug sa mga residente, ug minghatag usab og grabeng kalisdanan ug sakripisyo sa mga Pulang manggugubat nga walay pagpangduhaduha sa padayong pagalagad sa pumuluyo.

Sa wala pa ang gitakdang mga adlaw sa pagtuon, naglunsad na usab ang pasistang militar og operasyong kumbat ug gikastigo ang mga residente tungod sa kasuko niini nga wala nila makit-i ang Pulang hukbo. Tungod sa kusog nga presensya sa kaaway, gikinahanglang magpadaplin usa ang yunit sa NPA. Nagkahiusang hatagan og duon ang sitwasyong militar samtang mangandam sa ubang erya para sa pagtuon. Wala magdugay, nagmadinaugon ang paglunsad og aksyong militar ug nabitad sa laing direksyon ang lihok sa kaaway.

Andam na ang lugar sa pagtuon ug ang mga instruktur ug tumutuon nga mga Pulang manggugubat. Ang mga masa usab nangandam aron ipasiguro nga mahimong luwas ug madinaugon ang aktibidad. Bisan sa kakulang sa ubang teknikal nga gamit susama sa *projector* ug mga *hand-outs*, gisakmit sa kapangulohan sa Partido sa maong yunit ang maayong sitwasyong militar ug gilunsad dayon ang pang-Partidong pagtuon.

Mitambong sa Batakang Kurso sa Partido (BKP) ang 10 ka sakop sa Partido gikan sa yunit sa NPA. Lakip usab sa tumutuon ang duha ka Pulang manggu-

gubat para sa ilang pulitiko-militar nga pagtuon. Sa 12, duhang ang *middle-aged* ug kadaghanan mga batan-on. Ang tanan gikan sa hut-ong mag-uuma ug duha ang dili makahibalo mosulat ug mobasa.

Ang BKP ang una sa tulo ka kurso sa Partido nga nagtumong nga maarmasan ang mga sakop sa Partido sa minimum nga kahimanang teoretikal nga mosilbing

giya para sa padayong pagpanglimbasog para sa rebolusyonaryong pagtuon ug adlaw-adlaw nga rebolusyonaryong paglihok. Rekisito sab kini para sa mga kandidatong sakop sa dili pa sila mahimong hingpit nga sakop sa Partido ug kabahin sa pulitiko-militar nga pagtuon sa mga Pulang manggugubat.

*"Pagpalig-on..." sundan sa pahina 13*

*"KRP.." gikan sa pahina 11*

nga usa ka mangingilog og yuta ang nakaapekto sa kinabagan sa batakang masa sa Hagonoy. Uban sa mga lokal nga aktibistang masa, ilang gi-organisa ang mga biktima sa maong mangingilog og yuta. Nagmadinaugon sila sa paglunsad og kultibasyon sa yuta sa lugar ug pagpapirma og mga petisyon, ug gi-organisa nila ang mga biktima ngadto sa usa ka organisasyon.

Milabay ang usa ka tuig, ang mga tropa militar mingbuhi sa ilang pagka-mangtas batok sa mga lumulupyo sa Hagonoy. Ang mga aktibistang masa pabalik-balik nga gipailawom sa interogasyon, pagpanghulga ug intimidasyon. Ang mga naa sa lokalidad gipailawom usab sa usa ka langkub-barangay nga *surrender program*. Sulod sa dul-an duha ka tuig, ang Hagonoy gipaubos sa Retooled Community Support Program (RCSP) sa Philippine Army, diin ang mga pasistang sundalo naglunsad og mga aktibidad pangsaywar ug nagkampo sa mga lugar nga dagha'g tawo, lakip na ang mga simbahan ug tulunghaan.

Ang natukod nga mga organisasyong masa ug lokal nga organisasyon sa Partido nagpabiling lig-on sa ilang baruganan sa pagkahusto sa gubat nga gilunsad sa NPA nga ilang nakat-onan sa pagtuon sa KRP. Dugang nilang nasabtan nga ang ilang kadaugan batok sa maong agalong yutaan temporaryo lamang hasta nga makuptan na sa proletaryado ang gahum sa estado sa nasudnong kalangkuban.

Sa mga natun-an sa mga rebolusyonaryong pwersa sa KRP, ilang nagamit pag-ayo ang hut-onganong pagtuki ug duha ka taktika sa paglunsad og agraryong rebolusyon ug sa pag-atubang sa tropa sa kaaway, ug pagsalmot sa demokratikong rebolusyon sa katawhan aron lumpagon ang pulitikanhong gahum sa nagharing hut-ong. Ang pag-aplikar sa KRP ug uban pang mga pundamental nga dokumento sa Partido mahitungod sa rebolusyong Pilipino usa ka nagpadayong hagit para sa mga rebolusyonaryong masa, dili lamang sa Hagonoy, kung dili sa tibuok nasud. Ang mga Pulang manggugubat sa Negros gikinahanglang mosubay sa giya niining mga dokumento aron mapatigbawan ang walay hunong nga dinagkung operasyong kombat sa tropa sa kaaway ug dad-on ang gubat sa katawhan sa bag-o nga ang-ang. **RP**

"Pagpalig-on..." gikan sa pahina 12

Adunay tulo ka libro ang BKP diin ang unang libro naghisgut sa baruganan, panglantawan ug pamaagi sa proletaryado, ug introduksyon sa mga batakang prinsipyo sa Marxismo-Leninismo-Maoismo (MLM): materyalismong diyalektiko ug materyalismong istoriko, ekonomiyang pangpulitika, ug syentipikong sosyalismo. Ang ikaduhang libro ang esensya sa BKP ug diri nagtuon sa tukma ug mamugnaong pag-aplikar sa Partido sa mga batakang prinsipyo sa MLM sa kongkretong kahimtang sa katilingbang Pilipino ug paghikyad sa pangkinatibuk-ang linya sa pulitika-ang demokratikong rebolusyon sa katawhan. Ang ikatulong libro usab, naghatag sa paigo ug kumprehensibong pagsabot sa batakang kinaiya ug kasaysayan sa Partido Komunista sa Pilipinas (PKP) isip abanteng destakamento sa proletaryong Pilipino.

Sulod sa upat ka adlaw nahuman ang pagtuon. Pinaagi sa eksam ug pormal nga pagtasa, nakita sa mga tumutuon ang ilang natun-an gikan sa diskuyon. Pormal nga gi-human ang pagtuon sa BKP pinaagi sa usa ka malipayon ug mabungahong programa sa *graduation* diin gipaila ang mga nakatapos. Gipakita sab sa mga tumutuon ug instruktur ang talento sa kanta nga kabahin sa rebolusyonaryong kultura. **AP**



## Balita sa Isla

### No to Privatization!

Gilunsad ang Negros Consumers Watch, usa ka alyansa batok sa giplanong *Joint Venture Agreement* (JVA) sa Central Negros Electric Cooperative (CENECO) ug Ignite Power and Energy Holdings, Inc niadtong Marso 18. Gikan Abril hangtud karon, aktibo ang pagbatok sa katawhan sa pribatisasyon sa CENECO.

Matud sa grupo, ang ilang mobilisasyon nanawagan nga dapat ang mga polisiya ug programa sa mga pangpublikong yutilidad ug serbisyo mohaom sa interes sa mga mamumuo ug konsumidor, ilabina gyud ang mga *marginalized* nga sektor.

Sa Mayo 24, natukod usab ang mas lapad nga Anti-CENECO JVA Coalition nga panaghiusa sa mga konsumidor, empleyado, tawong simbahan ug uban pang organisasyon para sa hiniusang pagbatok sa JVA sa CENECO ug Ignite Power and Energy Holdings, Inc (MORE Power).

Nagtoo ang kining koalisyon nga ang tumong sa JVA mao ang ganansya sa serbisyo sa kuryente nga naghatag og kabug-at sa mga konsumidor.

Sa usa ka *press conference* niadtong Hunyo 8, hingpit nga gikundenar sa Negros Consumers Watch ug Anti-CENECO JVA Coalition ang pagtraydor sa opisina sa CENECO sa pagratsada sa pirmahanay sa kasabutan kuyog ang MORE Power.

Tungod sa peligro sa seguridad sa trabaho ug atake sa unyon sa mga empleyado sa CENECO human ang pagpirmahanay sa Primelectric Holdings ug CENECO management, nagpasa og *notice of strike* ang unyon sa mga empleyado sa CENECO sa National Conciliation and Mediation Board niadtong Hulyo 19.


Nagprotesta sab sa atubangan sa opisina sa Civil Service Commission sa Quezon City ang 58 ka kanhi empleyado sa Bacolod City Water District (BACIWA) niadtong Abril 10 para magdemanda og aksyon sa ilang *illegal termination case*, gikuyogan ang aktibidad sa mga empleyado sa nagkadaiyang mga *water district* ilawom sa han-ay sa Water for People Network.

### No to Jeepney Phase Out!

Niadtong Marso 6, nagprotesta ang mga grupo sa transportasyon batok sa pagphase out sa mga dyip ug nangayo sa usa ka maki-katawhan nga *modernization program*. Nikuyog usab ang mga grupo sa kabus nga tagadakbayan ug mga empleyado sa BACIWA para protesta-han ang mga *reclamation project* ug pribatisasyon sa water district.

Nadayon ang transport strike sa lain-laing grupo sa mga *drivers* ug *operators* niadtong Marso 8 tali-

"Balita..." sundan sa pahina 14



"Balita..." gikan sa pahina 13

wala sa nagpadayon nga *red-tagging* nga naangkon sa mga lider-masa ilabina gikan sa mga tigpaghut sa NTF-Elcac. Giduso sa grupo nga ilang katungod ug lehitimo ang paglunsad og *transport strike*.

Gipadayag nila sa atubangan sa Bacolod Government Center ang ilang mga panawagan: pagpatuman sa M.O. 2023-017 para sa pagpalugway sa kasamtangang mga rota sa dyip kutob sa ika-31 sa Disyembre ug pagpahunong sa City Ordinance 966 o Local Public Transport Route Plan (LPTRP) para sa proteksyon sa mga drayber, opereytor ug pasahero.

### **P750 National Minimum Wage!**

Nagpundok para sa Adlaw sa mga Mamumuo niadtong Mayo 1 ang nagkadaiyang mga grupo sa mamumuo para idemanda ang pagpataas sa suholan ug pagpaningil sa rehimen US-Marcos sa kontra-mamumo nga mga polisiya. Sa ilawom sa United Labor Alliance Negros (ULAN), giduso ang mga panawagan para sa *national minimum wage* nga Php750, pagtubag sa mga isyu sa pribatisasyon sa mga *public utilities* ug ang mga katungod sa mga konsumer, ug ang pagpanubag sa pagpasibaya sa administrasyon ni Marcos.

Nagdemanda ang mga mamumuo nga *mo-resign* ang gi-aligar nga abusado nga Executive Labor Arbiter nga si Jessie Sulano, pinaagi sa usa ka protesta nga gipatigayon sa opisina sa National Labor Relations Commission, Hunyo 13. Matud sa mga mamumuo, gi-abusohan ni Sulano ang iyang otoridad ug gipasagdan ang katungod sa mga mamumuo.

### **Hunongon ang militarisasyon! Defend Negros!**

Niadtong Marso 30, naglunsad og usa ka paghanduraw ang mga mag-uuma ug mamumuo para sa ika-upat nga anibersaryo sa pagpatay sa Negros 14, nga mga biktima sa *joint operation* sa pulis ug militar nga mas giila isip Oplan Sauron 2 pag-2019. Niadtong Abril 4, gipana-wagan usab sa mga grupo sa kabus nga taga-dakbayan nga *isurface* sa mga pwersa sa estado ang ilang organisador nga si Iver Larit nga usa ka tuig na nga "*missing*."

Gilunsad niadtong Hunyo 22 ang usa ka National Solidarity Mission nga adunay mga delegado gikan sa pesante, simbahan, grupo sa mga *human rights defenders*, kababayen-an, kabatانون ug uban pa para makuha ang tinuod nga datos gikan mismo sa mga residente kabahin sa pagmasaker sa pamilya Fausto (Hunyo 14 sa Himamaylan City) ug brutal nga pagpatay kang Crispin

Tingal Jr (Mayo 3 sa Kabankalan City).


Pagkasunod adlaw gipresentar ang inisyal nga resulta sa imbestigasyon sa grupo pinaagi sa usa ka *press conference* diin nigawas nga militar ang gitudlo sa pamilya ug mga residente nga naghimo sa pagpatay sa mga biktima. Dugang niini, nakuha gikan sa mga pahayag sa mga residente ang mga kadaut nga gihimo sa militar sa ilang lugar, kuyog na ang nahitabo sa pamilyang Fausto ug Tingal: adunay serye sa pagpanaka-saka sa mga panimalay, pagpangransak, paghukmong sa komunidad, pagpangharas sa mga residente, pagpugos nga *mo-surrender* ug gamiton isip giya sa operasyon, *pagred-tag*, ug pagpamatay.

### **Panalipdan ang bahandi sa kinaiyahan!**

*Kontra-reklamasyon.* Nagorganisa og usa ka *forum* ang alyansa nga namatok sa reklamasyon niadtong Marso 26 sa Purok Mahimulaton, Brgy. Bana-go, para talakayon ang giduso nga *reclamation project* sa pipila pa ka mga barangay. Kining mga proyekto ang makadaut sa kinatibuk-ang 1,080 ektarya sa mga kilid sa baybayon nga pinuyanan sa mga *marine life* ug gikuhaan og panginabuhian sa mga kabus nga taga-dakbayan ug mga mananagat.

Naghiusa ang gibana-bana 50 ka kabus nga taga-dakbayan ug mga mananagat sa gihimo nga *fluvial protest* sa kapistahan ni San Juan Bautista para dad-on ang padayong kampanya kontra-1,080 ektaryang proyekto sa reklamasyon sa Bacolod, Hunyo 25. Gipana-wagan usab nila ang pagbasura sa City Resolution No. 235 nga nagtugot sa proyekto sa reklamasyon sa syudad pinaagi ni Mayor Albee Benitez.

"Balita..." sundan sa pahina 15



## Visayas News

Kini ang bag-o nga seksyon sa Ang Paghimakas diin ipagawas ang mga rebolusyonaryong balita gikan sa ubang isla sa Visayas

### 4 ka armadong aksyon, gilunsad sa NPA sa Panay

SULOD SA UNOM KA ADLAW, sunod-sunod nga armadong aksyon ang gilunsad sa mga yunit sa Napoleon Tumagtang Command (NTC-NPA) Southern Panay gikan Mayo 2 hangtod 8.

Giharas sa mga Pulang manggugubat ang mga sundalo nga nagpundo sa CAA Detachment sa Brgy. Luyang, Sibalom, Antique, alas 10:00 sa gabii niadtong Mayo 2.

Gisundan kini sa pagsilot sa Atrila Builders Inc. sa Brgy. Cabungaan, Leon, Iloilo niadtong Mayo 5. Gibana-bana nga moabot sa Php900,000 ang kinatibuk-ang kantidad sa naparali-

sang mga kagamitan sa konstruksyon sama sa *backhoe*, *grader*, *elf truck* ug pison. Gisilotan ang maong kumpanya tungod sa daghang reklamo sa mga mamumuo sama sa dili paghatag og insaktong suhulan ug dili maayong kundisyon sa pamuo.

Sunod buntag, Mayo 6, gipabuthan sa NTC-NPA ang moresponde unta nga mga sakop sa militar sa Atrila Builders Inc. Gipuntirya sa NPA ang usa sa tulo ka *van* nga gisakyan sa mga sundalo gamit ang *command deto-*

"4 ka armadong..." sundan sa pahina 16



"Balita..." gikan sa pahina 14

**Kontra-Mina.** Nagprotesta ang mga residente sa Sta. Catalina, Negros Oriental, kuyog ang mga lokal nga opisyal ug mga nagkadayang organisasyon, batok sa Midan Corporation nga naghimo og eksplorasyon sa minahan sa Sityo Tarug, Brgy. San Francisco sa nahisgutang lungsod niadtong Abril 12, 2023. Matud sa mga nagprotesta, ang plano nga minahan ang moapekto sa liboan ka ektaryang yuta.

**Kontra-quarry.** Niadtong Mayo 19, nagprotesta sa Provincial Environment Management Office (PEMO) ang mga lumulupyo sa Silay para irehistro ang ilang mga isyu sa operasyon sa mga *quarry* sa Silay City. Gireklamo sa mga residente ang kasaba sa mga trak, pagkaguba sa mga irigasyon para sa ilang mga pananom ug posible kining momugna og baha sa ilang lugar.

Matud kanila, gipapirma sila og *attendance sheet* sa barangay pero gipagawas kini sa mga opisyal isip *consent forms* para sa *quarry*.

#### Kalihukan sa Katawhan

Niadtong Pebrero 25, gi-handom sa mga militanteng grupo ang ika-37 nga anibersaryo sa People Power Uprising pinaagi sa pagmartsa padulong sa *Fountain of Justice* sa Bacolod City. Nanawagan sila sa pagpanubag sa mga Marcos, hustisya para sa mga paglapas sa tawhanong katungod, ug kagawasan. Niadtong Marso 8, gipangulohan sa alyansa sa mga kababayan-an sa Negros ang aksyon protesta para pasidunggan ang mga kababayan-an kalambigit sa International Working Women's Day. Nanawagan sila og pagpataas sa suhulan, pagsiguro sa patas nga oportunidad sa panginabuhian, ug

proteksyon sa katungod nga mag-organisa.

Nanawagan ang progresibong grupo sa pagbasura sa Maharlika Investment Fund Bill sa dihang nagprotesta sila sa komemorasyon sa deklarasyon sa kagawasan sa nasud, Hunyo 12. Gisaway usab sa grupo ang padayong interbensyon sa mga langyaw'ng nasud sa soberanya sa Pilipinas sama sa Estados Unidos ug China.

Nagprotesta ang progresibong grupo sa adlaw sa State of the Nation Address ni Marcos Jr, para tubagon ang tinuod nga kahimtang sa mga Negrosanon sa usa ka tuig niyang pagpungko isip Presidente, Hulyo 25. Gawas sa pagdala sa mga sektoral nga panawagan, gipadayag sa nagkalain-laing sektor ang ilang pagka-dismaya sa presidente tungod wala kini naglantaw sa nagkagrabeng gutom ug kapobrehong ilang gi-atubang. **AP**

## Kadre sa Partido, aktibista gipatay sa Bohol

NIHATAG OG PULANG SALUDO ANG mga rebolusyonaryong pwersa sa Bohol kang Manuel “Ka Dodie” Tinio nga pito ka beses nga gipusil samtang nagdrayb og motor niadtong Abril 14, alas 7:00 sa gabii, sa utlanan sa Brgy. La Suerte, Pilar; Brgy. Bayungan, San Miguel; ug Brgy. Lus-ong, Ubay, sa Bohol.

Gitamnan sa mga pwersa sa estado ang iyang patay’ng lawas og usa ka .45 nga pistola.

Si Tinio usa ka kadre sa Komite sa Partido sa Bohol (BPC-CPP) ug konsultant sa National Democratic Front (NDF)-Bohol.

Matud sa pamahayag sa BPC-CPP, daku nga kawad-on sa rebolusyonaryong kalihukan sa Bohol ang pagkapatay kang Ka

Dodie apan ang iyang dugo mobisbis ug mosilbing abono sa daghang binhi sa bag-ong mga rebolusyonaryo gikan sa han-ay sa mga mag-uuma, mamumuo, mananagat ug uban pang mga kabus ilabina sa mga batan-ong iyang napukaw ug na-organisa, ug seguridad nga motubo ang gubat sa katawhan sa kabukiran sa Bohol.



Samtang, gikondenar sa NDF-Bohol ang pagpatay sa usa ka organisador ug aktibista nga dul-an usa ka bulan nga anaa sa kamot sa mga tropang militar.

Si Arthur “Ka Jasper” Lucenario gidagit sa 47th IB sa kaadlawon sa Abril 14 sa lungsod sa San Miguel samtang nag-sakay og motor ug gipagawas nga namatay sa engkwentro sa tunga sa AFP ug NPA Bohol niadtong Mayo 12 sa Brgy. Tabuan, Antequera, Bohol.

Gitamnan usab siya og .45 nga pistola sa iyang tuong kamot nga gipabuto sa mga sundalo sulod sa 10 minutos. Ningresulta kini sa grabeng troma sa mga molupyo sa lugar.

Nakaangkon si Lucenario og pagpa-antus ug nagkadaiyang porma sa tortyur nga, matud pa sa pamahayag sa NDF-Bohol, nagmarka sa iyang patay’ng lawas.

Si Lucenario usa ka organisador sa mga batan-on ug mga mag-uuma. **AP**



*"4 ka armadong..." gikan sa pahina 15*

nated explosive (CDEX). Tungod niini, niatras ang mga tropang militar ug wala na nipadayon sa ilang gitakdang operasyon sa lugar.

Samtang gipabuthan sa usa ka yunit sa NPA ang CAA Detachment sa Brgy. Igcococ, Sibalom, An-tique niadtong Mayo 8 sa buntag.

Matud sa pamahayag sa NTC-NPA Southern Panay, “kining mga aksyon nagpakita sa paningkamot sa mga yunit sa NPA nga batukan ug pakyason ang nagkagrabeng atake sa kaaway ilawom sa pasistang rehimeng US-Marcos II. Nagpakita sab kini sa padayon ug walay hunong nga suporta sa katawhan sa ilang tiunay nga manggugubat ug sa rebolusyonaryong pakigbisog.” **AP**





## Ang masang pakigbisog sa Brgy. Tamaraw

LIKON, TUNGASON UG LUGSONGON ANG gibaktas sa katawhan sa Brgy. Tamaraw sa ilang pakigbisog para sa yuta. Nakasugat man og kontradiskyon batok sa pamilya sa despotiko ug lunod-patay nga agalong yutaan ug usa ka burukratang agalong yutaan nga minggamit sa bangis nga mga goons nga mga CAFGU, RMG-PNP ug Army, nagmadinaugon ang paghiusa sa katawhan. Gigamit usab batok kanila ang mga balaud mismo sa reaksyonaryong gobyerno aron ma-ilog ang yuta nga ilang gipang-uma ug mahilom ang ilang pagsukol, apan wala niini napalong ang kalayo sa pagpakig-away para sa katungod ug kagawasan.

Kini nga baryo makita sa interyor ug suok nga bahin sa isla sa Negros. Niabot sa 5,000 ka ektarya ang gilapdon sa yuta nga langkub sa baryo. Human gi-logging sa Insular Logging Company (ILCO) ang mga kalasangan niadtong dekada '70, gitikad sa lumulupyong kining yuta. Ilang gihawan ug gikaingin ang mga siot ug lasangon. Mga lagutmon ug mais ang ilang gitanom para sa panginahanglang pangkonsumo.

Dihang nahawan na ang yuta, giangkon sa usa ka pamilyang agalong yutaan ang gilapdon sa uma nga kapin sa 1,970 ka ektarya. Nagpaila nga titulado nila ang yuta, busa ang mga lumulupyong angayang mohatag og bahin kanila. Aron hingpit nga maangkon ang yuta, gilingla sa pamilya ang mga mag-uuma pinaagi sa pagbaylo sa hunsoy, patadyong, pagpahulam og kwarta sa gamay'ng kantidad ug, kung dili makabayad, yuta ang mahimong kabaylo. Matud sa agalon, "walay katungod ang lumulupyong nga mor eklamo kay amoa ang korte."

Gakuha og bahin nga tersya parti ang pamilyang agalong yutaan sa mga saop matag ani sa produkto ug sila mismo ang

mobahin. Wala madugay, halos katunga sa mga saop ang nawagtangan og panginabuhian tungod gihimong pastuhan ug asyenda ang kapin kon kulang 250 ka ektarya. Ang ubang saop o mga mag-uuma nga nawad-an og uma nahimong mamumuo sa katubhan sa agalong yutaan. Nakasinati ang lumulupyong og grabeng pag-antus ug kabangis sa agalong yutaan, sama sa pagpangastigo, pagpahimulos sa kababayan-an, pagpangawat ug uban pang pagpahimulos.

Nahimong lamdag sa ilang mangitngit nga kahimtang ang pag-abot sa Partido, NPA ug rebolusyonaryong kalihukan sa ilang lugar. Nakasuway og paghulpa sa pagpangabuso sa agalong yutaan ang lumulupyong sa baryo sa pagsulod sa dekada '80 tungod nahimong kaylap na ang kalihukang masa ug rebolusyonaryong kalihukan ug NPA sa Negros, ilabina sa sur nga bahin.

Naghinay-hinay og atras ang agalong yutaan sa kahadlok. Tuig 1983 nagsugod og duso ang mga mag-uuma sa kontrapudal nga pakigbisog para sa pagpataas sa bahinay gikan sa tersya ngadto sa bahinay nga inupat. Gisupportahan sa Simba-

hang Katoliko ang ilang pakigbisog. Apan sa tuig 1986, panahon sa paglihig sa rebolusyonaryong kalihukan, naglunsad og "operasyon tago" ug kumpiskasyon ang kalihukang mag-uuma sa Brgy. Tamaraw nga lapaw na sa katakus sa kusog sa rebolusyonaryong kalihukan.

Tuig 1989, gigamit sa agalong yutaan ang kumander sa CAFGU detachment sa baryo aron kontrolon ang lumulupyong. Sa ting-ani sa mga produkto, mga armado nga CAFGU ang mobahin. Sa ulahing bahin sa tuig, gisilotan sa NPA ang gikaingong kumander. Niining higayona, ikaduha na nga henerasyon sa pamilyang agalong yutaan ang nagdumala sa ilang kayutaan.

Sa giya sa Kalihukang Pagtul-id, nakab-ot sa katawhan sa Brgy. Tamaraw ang panaghiusa pinaagi sa ilang organisasyon ug naangkon sulod sa tulo ka tuig ang kadaugan sa pagpusisyon sa yuta ug pagpalayas sa agalong yutaan.

Subling gilunsad ang kontrapudal nga pakigbisog niadtong 1995. Giduso sa mga saop ang bahinay gikan sa inupat ngadto

"Ang masang..." gikan sa pahina 17

sa linima. Naglunsad og dayalogo taliwala sa agalong yutaan ug mag-uuma nga gitambungan sa mga organisasyon sa katawhan sa urban ug mga opisyal sa baryo. Wala mingsugot ang agalong yutaan sa demanda sa mag-uuma, apan sa ulahi, wala na mingbalik ug gibuhian ang yuta ngadto sa mag-uuma tungod sa kahadlok.

Kining panahona, kaylap ang programa sa rehimeng US-Ramos nga Integrated Forest Management Agreement (IFMA), Socialized Industrial Forest Management Agreement (SIFMA) ug National Integrated Protected Areas System (NIPAS). Nagkolaborar ang agalong yutaan sa laing burukrata-agalong yutaan nga usa ka pulitiko sa distrito para sa proyekto sa Department of Environment and Natural Resources (DENR). Tuig 1997, gideklara sa burukrata nga iyang gipalit ang yuta sa agalong yutaan para sa mina, pastuhan, asyenda sa tubo ug pagtanom og kahoy. Usa kini ka iskema para magpabilin ang yuta sa gahum sa DENR ug dili mapailawom sa reporma sa yuta.

Subling gilunsad ang kontrapudal na kampanya ug naghimo og dayalogo nga gitambungan sa kapin 200 ka pumuluyo ug lain-laing sektoral nga organisasyon. Madinaugong giparehistro sa katawhan ang pagbatok sa reforestation, minahan ug pagpasta nga makaguba sa panginabuhian sa mag-uuma.

Sa tunga-tunga sa tuig 1997, gisundan og dayalogo batok sa Regional Mobile Group (RMG-PNP) ug surberyor mahitungod sa hinimo-himong kaso ug *warrant of arrest* para arestuhon ang 16 ka mag-uuma. Niining higayon, kapin 2,000 ka katawhan ang ningtambong diin wala niatubang ug niatras ang RMG

tungod sa kahadlok sa pumuluyo.

Sa ulahing bahin sa 1998 dihay dayalogo nga gihimo kuyog ang mga lain-laing sektor ug ligal nga organisasyon batok sa Department of Agrarian Reform (DAR)/DENR, asyenda, pastuhan, ug kontra sa mga plano sa burukrata-agalong yutaan. Naghiusa ang tanang katawhan sa Brgy. Tamaraw nga panalipdan ang yuta ug panginabuhian. Gisundan pa gyud kini og tulo ka hugna nga dayalogo batok sa pasismo, anti-mina ug reporestasyon.

### **Pag-ani sa bunga sa kadaugan**

Nahimong puhunan sa lumulupyo sa Brgy. Tamaraw ang ilang lig-on nga pagsukol sa agalong yutaan ug mga kakunsabo niini. Napataas ang produksyon sa mag-uuma, gawasnon na nga mobuhi og kahayopan ug hingpit nilang naangkon ang bunga sa ilang kahago.

Nagpabilin ang paninguha sa agalong yutaan nga balikon ang yuta pinaagi sa makanunayong pasismo ug militarisasyon. Bisan sa kalisdanan, padayon nga lig-on ang organisasyong masa sa baryo pinaagi sa sikreto nga paglihok ug pagtinabangay dira sa kooperasyon isip kooperatiba nga kinaiya sa Pambansang Katipunan ng mga Magbubukid (PKM).

Dagyaw-alayon ang tipikal nga pamaagi sa orgasisyon para solbaron ang teknikal nga pagpalambo sa produksyon. Panahon sa IBKP adunay komunal (pagtanom og mga utanon ug lagutmon) nga natukod ug nahimo ang mga *agri-training* sa baryo. Nasumpayan ug nahimong kaylap kining kalihokan sa mag-uuma sa Brgy. Tamaraw sa tuig 2017 pinaagi sa tagsa ka grupo sa Hingpit nga Asosasyong Masa (HAM).

Dihang namatikdan sa pasistang kaaway ang kolektibo nga

pagtrabaho sa katawhan, gi-atake ang simple nga kooperasyon sa baryo ug temporaryo nga gihunong ang dinagkuan nga pagtrabaho apan padayon ang ginagmay nga grupo sa pagtrabaho sa paglikay sa mata sa kaaway.

Sa hugot nga paghiusa sa katawhan, paspas lang nga maulbad ang mga panagbangi taliwala sa mag-uuma susama sa kontradiksiyon sa utlanan, kadaot sa kahayopan ngadto sa pananom, prendahanay, ug pangpamilya nga bahinay sa propiedad sa yuta.

Sa panahon sa pandemyang COVID-19 ug bagyong Odette niadtong 2020 ug 2021, nakalunsad og mga pagtuon ug serbisyo medikal sa baryo kuyog ang yunit sa NPA bisan sa limitasyon sa kahimanan medikal ug mga paghanas. Gihimoan og kampanya ang pagtambal sa mga komon nga sakit gamit ang *acupuncture* ug pagpakuyanap og *herbal* ug tradisyonal nga pagpanambal kombinasyon sa *western* nga pagpanambal.

Dihang nahalitan ang tibuok baryo sa bagyong Odette, paspas sab nga nakapatindog sa mga naguba nga panimalay pinaagi sa dagyaw sa lumulupyo. Kuyanap ug aktibo nga ningtubag ang tanang mga HAM Group. Niabot sa 70-90 ang napalihok nga indibidwal ug lima ngadto sa pito ka mga balay ang napatindog kada adlaw. Naayo ang mga balay sa masa nga walay tabang gikan sa reaksyonyong gobyerno.

Nahimong tinubdan sa Pulang manggugubat ang Brgy. Tamaraw ug nitubag kini sa nagkadaiyang rebolusyonaryong gimbuhaton sa larangan bisan sa lain-laing larangan gerilya sa tibuok Negros. Maong grabe ang paninguha sa mga pwersa sa estado nga gub-on ang rebolusyonaryong kalihokan ug organo sa gahum pangpulitika nga napundar sa baryo.

"Ang masang..." sundan sa pahina 19

## Tamlang Valley: "Sona sa Neoliberal nga Adyenda"



ANG TAMLANG VALLEY USA KA sityo nga daku'g populasyon nga nahimutang sa bukirong bahin sa Brgy. Talalak, Sta. Catalina, Negros Oriental. Kini ang sentro sa ekonomiya sa mga residente sa lugar nga halos mga kabus nga mag-uuma ang nagpuyo.

Gamit ang malinglahong Barangay Development Program (BDP) sa NTF-Elcac, ang reaksyonaryong estado nagtumong sa pagtukod sa Tamlang Valley isip usa ka "Little Baguio", pinaagi sa implementasyon sa pag-convert sa gamit sa yuta, ekoturismo, mina ug uban pang proyekto.

### Kauswagan para sa nagharing hut-ong

Ang BDP usa ka agianan para sa daghang mga iskema nga nagtumong sa pagpalig-on sa mga negosyo sa mga lokal nga komprador-agalong yutaan nga mga burukrata susama sa mga magka-banging pamilya sa Teves ug Degamo, ug sa mga Lopez.

Ang pamilya Teves nagpundo sa mga lokal nga lumulupyo sa pag-convert sa ilang mga pananom gikan sa mais ug lubi ngadto sa tubo para sa pagsusteni sa gipanag-iyang mga arosera/sentrales sa pamilya

*"Tamlang..." sundan sa pahina 20*

*"Ang masang..." gikan sa pahina 18*

Sa 2016-2022, hilabihan ang pakig-away sa masa batok sa paghari sa rehimen US-Duterte paagi sa berdugo nga PNP-AFP sa kagusto nga gub-on ang rebolusyonaryong kalihokan ug organo sa gahum pangpulitika nga napundar sa baryo. Gigamit niini ang paglansi, psywar ug kabangis batok sa rebolusyonaryong kalihokan pinaagi sa doktrinang US nga "whole of nation approach" ug kontra-insurhensyang kampanya sa NTF-Elcac.

Pipila ka lider masa ug rebolusyonaryong masa ang namartir sa pasismo ug kapintasan sa rehimen US-Duterte. Daghan ang gidakop gamit ang hinimohimong kaso ug hangtod karon anaa pa sa nagkadaiyang priso-han.

Daghan pa ang mga brutali-dad sa paglapas sa tawhanong katungod nga naangkon sa lumulupyo sa Brgy. Tamaraw. Apan ang masa padayong nagtindog ug nisukol pinaagi sa rebolusyonaryong diwa sa pagtinabangay sa organisasyon nga sikreto ug ginerilya nga paglihok.

Ang kinabuhi ug dugo sa mga martir ang ilhanan sa buhi nga pagsukol sa katawhan kuyog ang iyang Pulang hukbo. Mosilbi ning kalayo sa nagdilaab nga gibati sa katawhan sa pagpangita sa demokrasya, hustisya ug kaling-kawasan.

Ang Brgy. Tamaraw usa ka maayo nga pananglitan sa organisado nga kusog sa rebolusyonaryo nga organisasyong masa, mga lokal nga organisasyon sa Partido ug armadong kusog sa NPA nga sukaranan para makab-

ot ang kadaugan diha sa agrar-yong rebolusyon, armadong pakig-bisog ug pagtukod sa baseng masa ug mga organo sa gahum pangpulitika.

Sa padayong pagsaulog sa ika-50 nga anibersaryo sa NDFP niining tuig 2023, kuhaan og leksyon ang kasinatian sa lumulupyo sa Brgy. Tamaraw sa padayong pagpanday sa rebolusyonaryong kusog sa isla sa Negros taliwala sa kusganon ug dagku nga kontrarebolusyonaryong kampanya sa nagharing hut-ong. Sa pagpaninguha ug paghiusa makab-ot ang bag-o ug mas taas nga rebolusyonaryong kusog sa umaabot hangtod maangkon sa katawhang Pilipino ang tinguha nga hustisya ug nasudnon ug katilingbanong kagawasan. **AP**

"Tamlang..." gikan sa pahina 19

Teves; balanghoy ug tuba-tuba para sa *bioethanol*; ug cacao. Kining tanang produkto gitakda para sa eksport nga katuyoan. May dam usab nga tukuron sa mga suba sa Kawitan ug Siaton, nga magsilbing hydropower para sa Tamlang.

Ang duol nga busay sa Tamlang gipalambo para sa ekoturismo aron magsilbi nga suroyanan sa mga turista. Samtang, ang gipang-iya sa mga Lopez nga Energy Development Corporation (EDC) nagpatuman usab sa nagkadaiyang konstruksyon nga proyekto sa lugar, ilabina sa mga *forestal* nga kayutaan para makakuha og mga kahoy para sa dinagkuang *logging*, kuyog sa DENR nga nagbarug isip tigtamla para hatagan og pagtugot ang halapad nga pagpang-upaw sa kalasangan para sa benepisyo sa mga Lopez.


Ang tinguha sa mga lain-laing programa sa Tamlang Valley gihimo para sa pagmina sa *nickel*, *silicon*, *carbon*, ug mga *natural gas*. May kinatibuk-an kining 320,000 ka ektarya nga maglangkub sa lima ka munisipalidad (Sta. Catalina, Pamplona, Valencia, Sibulan kag Siaton) ug syudad sa Bayawan. Dili momubo sa 5,000 ka pamilya ang madislokar kung magsugod na ang maong proyekto.

Kining mga gitawag nga "kauswagan", usa lamang ka takuban para sa pagpangilog og yuta para sa neoliberal nga tuyo.

### **Sona sa paglapas sa tawhanong katungod**

Gikan sa implementasyon sa Memorandum Order (MO) 32 sa rehimeng US-Duterte, napailawom na ang Brgy. Talalak sa grabeng militarisasyon sa 11th IB.

Isip mga himan sa nagharing hut-ong, ang AFP naglihok para sa interes sa ilang amo'ng mga komprador burgesyia. Gidugangan



ang presensya sa tropa militar sa Tamlang ug sa uban pang kasikbit nga sityo sa pormang Retailed Community Support Program (RCSP).

Gitawag nga usa ka "sona sa kalinaw," apan ang mga merse-naryong tropa nagpatigayon og operasyong militar nga nagtarget sa mga sibilyan para pugos nga pasurenderon isip mga peke nga NPA pinaagi sa mini ug korap nga Enhanced Comprehensive Local Integration Program (E-CLIP) sa NTF-Elcac. Giharas, gihulga, iligal nga gi-aresto ug gipatay ang mga lumulupyong. Ang nangunang target sa AFP/NTF-Elcac naglakip sa mga mag-uuma ug mga residente nga nakapanag-iya og yuta nga gilangkub sa BDP aron kombinsihon silang mosunod sa neoliberal nga plano sa reaksyonaryong gobyerno.

Ang mga lasangon nga kayutaan nga gi-uma sa lumulupyong sa pila na ka dekada gipatrol-yahan sa mga *forest rangers* ug paramilitar nga grupo para panalipdan ang mga proyekto sa EDC. Gibutangan nila og mga gitagong kamera ang mga lati aron mamonitor og maayo ang mga lumulupyong.

Samtang, ang mga peke nga *surenderee* gipatrabaho sa mga AFP ug PNP detatsment. Sa usa ka report niini lamang, nakumpirma nga gisweldohan lang og Php200 kung magtiayon, samtang Php150 ang ibayad sa ulitawo/dalaga. Gihimo sab silang giya sa mga operasyon kombat sa militar.

Susama sa gubang plaka, ang AFP pabalik-balik nga naghanduraw sa ilusyong "nabungkag" na ang Southeast Negros Guerrilla Front, aron modani sa ilang mga amo nga mamuhunan sa lugar para makakuha ang ilang mga opisyales og mga suborno.

Ang Tamlang Valley isip "sona sa kalinaw" usa ka tin-aw nga manipestasyon sa alang-alang kolonyal ug alang-alang pyudal nga sistema. Ang katawhan padayon nga nagapos sa neoliberal nga palisiya sa imperyalistang US nga nagduon sa pagpanghimulos sa nasud para sa baratong suhulan sa kusog-pamuo ug hilaw nga materyales pinaagi sa agresyon sa mga pwersa sa estado, sa pagpahimulos sa mga pigado nga masa sa Negros Oriental. **AP**



## Pulang Saludo!

# Rebolusyonaryong kaisog taliwala sa kabangis militar

GIHANDOM KANATO ANG KINABUHI SA mga Pulang manggugubat nga gipatay sa militar bisan *hors de combat*. Gipakita nila ang ilang rebolusyonaryong kaisog taliwala sa kabangis sa berdugong militar. Mas bug-at pa sa bukid Kanlaon ang ilang kamatayon tungod gihalad nila ang ilang kinabuhi sa pag-alagad sa halapad nga masang linupigan ug pinahimuslan.

### Ka Yuhan

Si Ka Yuhan, 25 anyos, nahimugso niadtong Nobyembre 7, 1996 sa Brgy. Jonob-jonob, Escalante City, gikan siya sa pamilyang mamumugon sa uma.

Nisulod siya sa New People's Army (NPA) niadtong 2017. Nag-akto nga *Food and Logistics Officer* (FLO) ug nahimong iskwad lider. Sakop usab siya sa Komiteng Tigpatuman sa *Party Branch* (KTPB).

Hingatawa, joker ug "*cultural*" si Ka Yuhan. Buotan ug dali rang maduol sa mga kauban bisan sa mga bag-o lang niya nga kaila.

Na-martir si Ka Yuhan, kuyog ni Ka Bedam nga gipatay sa mga pasista nga 62ndIB samtang natulog niadtong Marso 9, 2022 alas 3:00 sa kaadlawon sa Brgy. Amin, Isabela, Negros Occidental.

### Ka Carding ug Ka Clea

Si Ka Carding (Elbert Quillano) gikan sa hut-ong mag-uuma. Nahimong lider sa simbahan, lider sa masa ug sa ulahing bahin, nisalmot sa armadong pakigbisog niadtong 2011.

Usa si Ka Carding sa mga yaweng kadre sa Partido nga nagpabuylo sa gubat sa katawhan sa larangan gikan sa seksyong gidak-on kutob sa pila ka pilo nga pagdaghan.

Nahimong sekretaryo sa larangan si Ka Carding sa tuig 2019. Usa ka maayong kadre ug



pinalangga sa masa. Gitan-aw nga edukador, doktor, tigtambag ug suod sa mga bata.

Samtang buotan nga asawa ni Ka Carding si Ka Clea (Je-is Quillano). Sa wala pa mosampa sa NPA, lider masa siya sa ilang lugar.

Kapila na ka higayong nakahigayon sa pagpanghulga, pagpangrantsak sa ilang balay ug pagdakop sa ilang mga anak sa tumong nga pugngan si Ka Clea sa iyang pagtabang sa iyang mga katagilungsod ilabina sa pagbutyag sa paglapas sa tawhanong katungod nga gihimo sa mga reaksyonaryong sundalo sa ilang lugar panahon sa mga operasyong militar.

Mas gipakita pa niya ang iyang taas nga porma sa pagtabang sa dihang nisunod siya sa iyang bana sa NPA bisan pa sa tuman

niyang kamingaw ug kahingawa sa iyang mga anak.

Nahimong opisyal medikal sa larangan si Ka Clea.

Gidakop si Ka Carding ug Ka Clea niadtong Abril 1, 2022, alas 3:30 sa hapon sa hiniusang tropa sa Criminal Investigation and Detection Group (CIDG) ug PNP sa Sityo Kulihaw, Brgy. Buenavista, Himamaylan City, Negros Occidental samtang nagpatuman og gimbuhatong masa.

Walay kalooy nga gipatay ang magtiayon sa maong tropa sa kapulisan, alas 6:00 sa hapon, human nga gitortyur. Gipagawas sa 94th IB nga namatay sila sa engkwentro sa tunga sa yunit sa Mt. Canseron Command (MCC-NPA) ug CIDG/PNP.

*"Rebolusyonaryo..." sundan sa pabina 22*

"Rebolusyonaryo..." gikan sa pahina 21

### **Ka Jekoy ug Ka Jorge**

Si Ka Jekoy (Mario Baldusa), gikan sa hut-ong mag-uuma. Gi-himugso sa Brgy. Bulwangan, Hinobaan, Negros Occidental. Kamanghuran sa upat ka mga managsuon. Buotan, kugihan ug responsable si Ka Jekoy. Nita-bang sa iyang amahan ug mga igsuon sa mga gimbuhaton sa uma.

Dihang ni *fulltime* na siya, kanunay'ng positibo ang iyang baruganan ug maayong mopropaganda sa mga kauban ug masa. Suod usab siya sa mga bata. Wala siya'y pagbalibad sa mga tahas. Nag-akto siyang platuron medikal.

Samtang si Ka Jorge (Janhel Sarsa), taga-Brgy. Planas, Guihulngan City, Negros Oriental. Mag-uuma ang hut-ong gigikanan. Hilumon, maayo sa trabaho ug walay pagpangduha-duha sa pagdawat sa mga gimbuhaton nga

gitahas sa Partido kaniya.

Gipatay si Ka Jekoy ug Ka Jorge sa engkwentro sa tunga sa 62nd IB ug Leonardo Panaligan Command (LPC-NPA) sa Sityo Binataan, Brgy. Quintin Remo, Moises Padilla, Negros Occidental niadtong Nobyembre 28, 2022. Nakahi-agum og gamay'ng samad ug buhi pa sila Ka Jekoy ug Ka Jorge human sa 30 minutos nga engkwentro. Inay nga hatagan og pangunang pagtambal (*first aid*) sa militar, gipusil sila hangtod namatay.

### **Ka Nonong ug Ka Ruben**

Si Ka Nonong (Arjen Mahinay), 73 anyos, gikan sa hut-ong mag-uuma sa Brgy. Pinggot, Ilog, Negros Occidental.

Nisulod siya sa NPA panahon sa dekada 80. Nipahuway siya sa panahon sa pagbuak. Girekrut sa Revolutionary Proletarian Army-Alex Boncayao Brigade (RPA-ABB) apan wala niya masabti ang mga gawi ug estilo

sa paglihok sa RPA-ABB maong nipahuway siya.

Daku ang kalipay ni Ka Nonong nga nasumpaya'g balik sa NPA sa ilang lugar. Nahimo siyang sakop sa BOP ug nitabang siya sa mga gimbuhaton sa hukbo. Ni-pultaym siya sa NPA niadtong 2019.

Maayong gipatuman ni Ka Nonong ang iyang tahas isip FLO sa platuron. Gisiguro niya ang mga kauban ug masa, kanunay'ng gipaulahi ang iyang kaugalingon. Usa sab siya ka mag-aawit, gitarista ug maayong mokomposo og kanta.

Matud ni Ka Nonong, "handum gyud nakong mag-NPA. Bisan may edad na, dili kini makababag sa akong pag-alagad sa katawhan. Diri na ko mamatay sa rebolusyon."

Si Ka Ruben (Junjun Callet), 38 anyos, gikan sa hut-ong mag-uuma. Gipanganak siya sa Brgy. Tanglad, Tayasan, Negros Oriental ug kinamagulangan sa mga managsuon. Inila nga mapinalanggaon sa iyang mga igsuon si Ka Ruben.

Sa pagsulod niya sa NPA, suod siya sa mga kauban tungod sa iyang pagkamatinaabangon ug pagkamapinalanggaon. Komedyante ug hingatawa, nahimong suod usab si Ka Ruben sa mga masa, kugihan ug walay pagbalibad sa mga tahas.

Gipatay si Ka Nonong ug Ka Ruben niadtong Pebrero 4 sa Sityo Mugni, Brgy. Oringao, Kabankalan City, Negros Occidental. Gidakop sila sa 94th IB sa wala pa ang engkwentro sa tunga sa MCC-NPA ug sa maong tropang militar.

Dili na makalihok ug makaistorya si Ka Nonong tungod sa stroke dihang gidakop sa militar samtang si Ka Ruben ang medikal opiser nga nag-atiman kaniya. Gipagawas sa 94th IB nga namatay sila sa engkwentro. **AP**





## Tambag Medikal

## Unsa ang heat stroke?

ANG **HEAT STROKE** MAO ANG labing grabeng porma sa balatiang may kalabtanan sa sobrang kainit sa panahon kung diin sobra ang kainit sa lawas. Dili makaya sa lawas ang sobrang kainit tungod sa pagka-iban sa tubig sa lawas (*dehydration*). Gikunsidera kini isip emerhensyang medikal.

### Mga Hinungdan:

- Init ug alimuot nga panahon
- Lagsik nga ehersisyo sa init nga panahon
- Pagka-iban sa tubig sa lawas (*dehydration*)
- Sobrang direktang eksposyur sa adlaw

Dunay taas nga risgo sa heat stroke ang mga masuso, mga edaran, atleta ug mga indibidwal nga nagtrabaho sa gawas sa balay.

### Mga sintomas:

- Ang temperatura sa lawas mo-abot sa sobra sa 40 *degrees Celsius*
- Ang unang senyales ang makuyapan
- Pagsakit ug paglabad sa ulo
- Pagsuka
- Kulang sa singot bisan sa kainit
- Init ug pagpanglupad sa panit
- Pagpanggahi sa kaunoran
- Paspas nga pitik sa kasing-kasing
- Paspas ug mabaw nga ginhawa
- Pagbag-o sa kinaiya sama sa: pagkalibog, limtanon, o murag gatuyok ang kalibutan kung maglakaw

### Unsaong Malikayan:

- Limitahan ang oras nga naa sa gawas sa balay tungod sa grabeng init.
- Mo-inom og daghang tubig.
- Likayan ang pag-inom og tsaa, kape, *soft-drinks* ug imnonon nga makahubog.
- Mosul-ob og tag-as nga sinina kung mogawas. Mosul-ob usab og mga gaan, hayag ang kolor, luag nga sinina ug lapad ang kalo.
- Himuon ang mga bug-at nga aktibidad sa buntag o hapon, kung diin bugnaw na ang panahon

### Pamaagi sa pagtambal:

- Ibalhin ang tawo sa landong nga lugar o sa sulod sa balay
- Pahigdaon nga gipasaka ang bitiis
- Kung kaya niyang moinom, paimnon og bug-

naw nga tubig

- Huboon ang sinina, butangan og bugnaw nga tubig ang panit ug paypayan
- Butanga'g *ice pack* ang ilok, pulso, lapa-lapa ug bugan

SONATA

### Kamo ang hinungdan

*Komposo ni: Ka Dapen • Tono: Ikaw ang Dahilan*

Ngano ba kon kamo akong makita  
Ang dughan ko magkuba-kuba  
Namatikdan ko mga pag-antos mo  
Gusto ko nga motabang ninyo

Kong sa kiliran ka gibati ko'g kamaya  
Naghari ang kaninyo nabalaka  
Gisulayan ko na nga kamo kalimtan na  
Pero hangtod karon dili kayang talikdan ka

(KORO)

Tungod kamo ang anaa sa ilalom  
niining dughan  
Sa among mga paningkamot  
kamo ang hinungdan  
Dili kami makatulog sa inyong kasakit,  
kalisod  
Kaninyo mahal kong masa,  
kamo ang hinungdan

Unsay among buhaton  
hingpit alagaran ka  
Kay kamo among kalipay sa among kinabuhi  
Kamo among bayani, paglaum sa tanan  
Hustisya pangita-on ta,  
para sa kagawasan

(Repeat Koro)

Instrumental

(Repeat Koro 2x)

Kamo ang mahal

***ISULONG ANG  
GUBAT SA KATAWHAN!  
KAB-OTON ANG  
MAKATARUNGANON  
NGA KALINAW!***

